



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail: tiryimiyim@gmail.com

TAPAK 7

Yangia anidakangma :

Tir Yimiyim

tiryimiyim@aolima

tir yimiyim

TAPAK 10

Mamata-i PM dang Electricity (Amendment) Bill magizüksü mepishi

Tokyo Olympics: Neeraj Chopra-i gold medal angu



VOL. XVIII NO. 295 (ADOK 295) DIMAPUR

AMUNGNÜ (SUNDAY)

LUROI (AUGUST) 08, 2021

₹ 5.00

NCD president aser vice president (Admn) shimogo



Honibarnü Conference hall, Naga Council Dimapur nung Dimapur Rongmei Baptist Church pastor Rev. Meingandai Gangmei-i NCD president Etsungmomo Kikon aser vice president Holuto Aye na meshiteta sarasademtsüba angur. (Dimapur, August 7)

**Dimapur, August 7, 2021 (TYO):** 2020-2025 kümsük atema Naga Council Dimapur (NCD) president inyaksü atema Retired Additional Director & taoba Lotha Hoho Dimapur Chairman, Etsungmomo Kikon aser vice president (Admn) atema Holuto Aye na shimogo.

Yaküm December ita taoba NCD president K Ghokheto Chopy asüba sülen menden tazüing liasü.

Honibarnü NCD conference hall nung sentong agidang "NCD-i Naga nunger aser Dimapur nung alirtem taginübatem kümsük ayutsü atema inyaksü" ta Etsungmomo Kikon-i ashi.

"NCD indang ketdangsuba shitak ayuba ajanga ochimashi nungi kümsük ayutsü. Taoba mapang NCD-i tayongzükba aika ajuruogo aser iba nung okadak NCD ketdangpurtem anema ken o benokba dena lir. Item ajanga tesüiba küm ka tashi NCD inyaksangshi nung tetsükdaksü ajuruogo" ta paisa ashi.

"NCD councilor tem aser kin balala lennirtem NCD inyaksangshi nung yimtenren tenokdangbatem maitdaksü longjemer inyaka aotsü mepishir" ta Etsungmomo-isa ashi.

Paisa councilor tem dang pa nem iba menden nung amentsü maongka agütsüba atema pelaba metetdaksü.

Advisor Tovihoto indang taila Facebook profile amshir ka apu



Sunil Kumar

**Dimapur, August 6, 2021 (TYO):** Power Advisor, Tovihoto Aye indang taila Facebook profile amshir dak sendakba ken o nung Dimapur Police-i August 6, 2021 nü nisung ka puogo.

Iba nisung ya Sunil Kumar (26) lir aser pa ya Punjab kübok Fazilka District nung alir.

Iba taila Facebook account ajanga nisung aika nem bank account number tem agüja

senotsü teyari meshi. DCP Zone-II ketdangsuba kübok iba taila Facebook page indang bushisüingdanga aodang nisung maitsü bushitet.

Iba sülen Dimapur Police nungi züingsem 3-i Punjab Police teyari agia Fazilka District kübok Sito Gunno yimdak Sunil Kumar apu, ta Addl. Dy. Commissioner of Police (Crime) & PRO, Dimapur-i sangdong ka nung ashi.

PWD Nagaland-i mapa shitak meinyakba ajanga Rs 141 crore talila endok Tim masübalen nungi Rs 32 crore ajangzük; Mapatong 90 metembang lir

**Kohima, August 8, 2021 (TYO):** Public Works Department (PWD) Nagaland-i mapa shitak meinyakba ajanga 2014-19 tsüingda Rs 141 crore talila endoktsüsa aküm.

State Assembly monsoon session nung iba osang ya Comptroller Auditor General (CAG) of India report nung lir.

2014-2019 tsüingda state sorkari residential aser non-residential buildings atema mapatong 254 inyaksü shim aser itemji PWD indang division balalai Rs 671.95 crore endoka yanglutsü lemzüksü, ta CAG report nung shia lir.

Housing division 7-i mapatong 71 inyakba nungi 26 renemogo aser March 2019 tashi nung mapatong 45 teinyakdak liasü.

Kasaji, Engineering Division 17-i mapatong 256 inyaksü lemzük aser iba nungi mapatong 132 renem aser 124

teinyakdak lir. Mapatong 327 inyakba nung Rs 683.72 crore endok.

2014-19 atema June nungi September 2019 tashi Performance Audit agia liasü, ta CAG-isa metetdaksü.

Iba nung Department-i mapatong 4 nung ali dak sendakba mapa shitak meinyak aser mapatong 2 nung mapang shitak nung ali magütsüba ajanga mapang aser sen endok, ta parnokisa ashi.

PWD Department-isa mapang shitak nung mapatong 14 metenzükba ajanga Rs 141 crore talila endoktsüsa aküm, ta CAG-isa ashi.

Central Scheme balala kübok India sorkar ket nungi Department-i Rs 212.92 crore angu saka Nagaland state sorkari parnok lemzükba Rs 27.02 crore magütsü, ta CAG-isa ashi.

Ano külen, Finance Department-ia Department nem ita 3 nungi 15 tashi menur ang sen agütsü.

Executive Engineer 4-i High-Level Technical Committee (HLTC) dang masüingdangtepi aser State Level Programme Implementing Committee (SLPIC) nungi temelaba magii Detail Project Report (DPR) pezü renem aser ibaji temzüing alema inyakba lir, ta CAG-isa metetdaksü.

Ano, Executive Engineer 2-i contractor asem nem advance payment ta ser Rs 17.15 crore tim mesüi agütsü. Parnok den contract deed agreement nungbo advance payment indang mali sernung sen agütsüm ta CAG-isa ashi.

Mapatong 55 nung engineering division temi mapa meinyak sernung Rs 15.74 crore agütsü.

Public Works and Engineering Division temi mapatong 119 inyakba nungi mapatong 90 tashi küm 13 den tema ano metembangtet lir, ta CAG-isa ashi.

COVID-19 Nagaland: 106 dak putet, 75 taneptsü angu & 1 asü

**Kohima, August 7, 2021 (TYO):** Honibarnü Nagaland nung nisung 106 dak COVID-19 putetba züingsema nisung ajak agi 28,551 kümogo.

"Tanü nisung 106 dak COVID-19 aliba putet. Parnokji Dimapur nung 36, Peren nung 27, Kohima nung 15, Mokochung nung 12, Zunheboto nung 5, Wokha nung 4, Tuensang nung 3, Phek nung 2 aser Longleng o Mon nung kaka (1) lir" ta Integrated Disease Surveillance Project atema State Nodal Officer, Dr Nyanthung Kikon-i ashi.

"Honibarnü COVID-19 puteta alir nisung 75 taneptsü angu. Parnokji Kohima nung 45, Dimapur nung 19,

Mokokchung nung 5, Peren nung 3 Phek nung 2 aser Longleng nung 1 lir. Parnok züingsema taneptsü angur 25,757 lir" ta paisa ashi.

Nagaland nung COVID-19 nungi taneptsü angur 90.21% lir aser tang nisung 1,398 anepaludar, ta Dr Kikon-isa ashi.

Tanü Mon nung COVID-19 puteta alir ka asüba züingsema tasür 583 kümogo saka nisung 14 bo tanga tashidak ajanga asü, ta paisa shisem.

Tang tashi nung COVID-19 alitsü akok ta temolung melemi bilemba sample 275,755 tendangogo. RT-PCR ajanga 103,943, TrueNat ajanga 69,655 aser Rapid Antigen Test ajanga 102,157 tendang, ta Dr Kikon-isa

metetdaksü.

"Hokolbar tashi Nagaland nung nisung 629,510 nem COVID-19 vaccine indang dose 787,111 agütsüogo" ta State Immunization Officer, Dr Ritu Thurr-ia ashi.

"Vaccine agirtemji frontline workers 60,827, healthcare workers 15,978, arishi küm 45 ser temapur 187,685 aser arishi küm 18 nungi 44 tsüingda alir 365,020 lir" ta paisa ashi.

"Vaccine agirtem rongnungi nisung 157,601-i dose anaprong agiogo. Parnokji frontline workers 40,785, healthcare workers 12,586, arishi küm 45 ser temapur 103,815 aser arishi küm 18 nungi 44 tsüingda alir 415 lir" ta Dr Thurr-isa metetdaksü.

Nagaland nung passenger garitem atema SOP tasen latettsür

**Dimapur, August 7, 2021 (TYO):** Nagaland sorkari Honibarnü passenger garitem atema SOP tasen ka agütsüogo. Iba ya August 9, 2021 nungi mapa küma inyaksü.

SOP tasenba nung gari nung senzür ajaki mask enoktsü aser bus o gari tilatem nung nisung 50% dang amentsü indang shia lir.

Taxi o auto-rickshaw tesülen nisung ana dang amentsü aser tejaklen passenger mamentsü

aser menden row ka dak tema süra, row shia nung passenger ana dak tali mamentsüla ta SOP nung metetdaksüogo.

Taxis, auto-rickshaw, bus dena passenger gari shia nung driver and attendant tem dak shirangba yimya kecha malitsüla aser Covid19 indang vaccine agirtem asütsüla. Dose anaprong magiyonga mezüing dose agir anogo 15 bo süir asütsüla.

Driver/attendant-i vaccine

magi süra anogo 15 majungdang RT-PCR/TrueNat mesüra CBNAAT ajanga Covid19 negative test report abentsüla, ta SOP nungsa shia lir.

Maneni, inter-district bus service/taxi service nungbo driver/attendant dak alia passenger tema kasa telatetba kübok adentsü.

Talisa, nija garitem nunga menden row ka nung nisung ana tema mamentsüla aser mask enoktsüla, ta SOP nungsa shia lir.

# Dimapur nung Yellowchain lapokogo



**Dimapur, Luroi/August 07, 2021 (TYO):** Hokolbarnü, Hill view Colony, Dimapur nung, Deputy Commissioner (DC) Dimapur Rajesh Soundarajan-i Yellowchain outlet ka lapoktsüogo. Iba E-commerce sabang - Yellowchain ajanga 'goods & services' tem shishilembatsü atema tesem ajungalen tesendaktep yanglutsütsü nükjidong lir. Iba den külemi, Yellowchain ajanga entrepreneurs, service providers, tayoker aser shishilembaba yimya ajak sendaktepsü asoshi sabang ka agütsütsü. Yellowchain ya Investment and Development Authority of Nagaland (IDAN) ajanga nungitba/achaayangba free E-commerce sabang ka lir. Iba outlet lapkba mapang,

DC-i mozü mamshi (organic) yangluba product tem ajungkettsütsüla ta telok ajungshia liasü. IDAN CEO Alemtemshi Jamir-i, E-commerce Yellowchain ajanga commercial dealer ajunga den longjemer inyaksü. Covid-19 wara agi nübur timtemba mapang, State nung rongsenketzüng inyakyim ajungkettsütsü asoshi iba outlet ya sabang ka liasü aser nisung mashi kati Yellowchain nung shishilembaba maparen tenzüksü akok, ta ashi. Alemtemshi-i ashiba agi, Yellowchain lapokba ajanga shishilembaba maparen achaayangba dang masü, saka digital (internet, technology, smart aser digital device) tsütsü nüburtem jangyumedema aotsü

asoshi maongka talila agütsütsü. Iba outlet nung sellers aser service providers 500 dak tema register süa lir, ta pai ashi. Project developer, Mhathung Kithan-i ashiba agi, alima ajunga asungba COVID-19 wara ajanga rongsenketzüng maparen nung tenokdangba tulu adokdaksüba asadanteta, Yellowchain tenzüksü asoshi tasa ngutet. State nung rongsenketzüng maparen yanglua aser ajungkettsütsü; entrepreneurs, tayoker, talir, aser service providers tem tsüngda tesendaktep yanglutsütsü asoshi Yellowchain mapatong tenzü. 2020 küm August 15 nü Chief Minister, Neiphiu Rio-i Yellowchain tenzüksü liasü, ta sangdong nung shia lir.

## NBSE-i National Education Policy indang metetdaksü

**Dimapur, Luroi/August 7 (TYO):** National Education Policy (NEP) 2020 ajanga inyakdang angazükba education system ka indang jembir, koba aso 21buba nung aroka ia bilemdangba aser tebilemstü bentettsü atema tasatem dak rangloker inyaker. NEP 2020 ya lenla ajak nung aser multidisciplinary education dak rangloker lir, anungji iba inyakyim ya general education den vocational education bendenloksü asoshi tali rangloker lir, ajita asünungdang arts aser sciences, curricular aser extra-curricular inyakyim aser vocational aser academic streams tsüngda tebandang agintettsü. Iba policy nükjidongji, tanur ajak vocation kabosa angazükdaksütsü asoshi lir aser Class VI sülen ano tanga vocation aika den metepeladaksütsü. Iba ajanga dignity of labour dak tali ranglokdaksütsü aser tanga vocation tem koda tongtibang iba indang angatetdaksütsü. Policy kübok 2025 küm tashi nungbo tangazükertem shilem 50 bosa vocational education

den metetpeladaksütsü nükjidong lir. Vocational/skill education ya National Skill Qualification Framework (NSQF) kübok lir. NSQF-i jenjang balala nung shisatsü, tasa aser sempet dak ajemdaker temelaba agütsütsü atema ayongzüka inyaker. NSQF-i linük ajunga nung schools, vocational institutes aser higher education institute tem ajak qualification aser certification atema arok principle aser guideline tem benoker. Qualification ya secondary nungi doctorate jenjang tashi aser iba sülen national standards indang international recognition tashi lir. NSQF ya competency based skill framework ka lir aser iba ajanga vocational education, vocational training, general education aser technical education atema lenmang aika agütsütsü aser iba janga nisung ka tangazükba jenjang temaba den sendaktepsütsü. Iba ajanga nisung ka temsüa kümdaksütsü, job market-i yoktsü aser tali arantetsütsü atema mapang tajung ka nung tasa talila bendenloksü asoshi meyipa arutettsü.

Tangazükter shilem 50 bosa tongtetsü atema NEP 2020 nükjidong aliba dak ajemdaker Nagaland Board of School Education-i, 2022 küm nungi tenzüka shilem balala küma lemsar Classes IX nungi XII tashi nung Vocational Education benoktsü. Vocational education ya class IX & X nung optional subject asütsü aser class XI & XII nung elective subject asütsü. Class IX nungi XII tashi atema Vocational Education asoshi Competency Based Curriculum aser Syllabus ya Pandit Sunderlal Sharma Central Institute of Vocational Education (PSSCIVE), Bhopal-i yanglur aliba curriculum aser syllabus nungi ajizüksü. Iba dak sendakba nung züngoksema aliba school tem dang pei school nung vocational education benoka tangazükertem nungdakba skill tem arantetsütsü ayongzüko. Vocational Education benoktsü atema Application Form ya www.nbsenl.edu.in Portal Forms section nung upload süja lir. Tetuyubatem ajak Form nung keta lir.

BENOKTSÜ ALIBA COURSE TEM YAMAI ALITSÜ:		
Sl. No.	Course	Sector
1.	Domestic Data Entry Operator	Information Technology Enabled Services (ITeS)
2.	Food & Beverage Service Trainee	Tourism & Hospitality
3.	Store Operation Assistant	Retail
4.	Assistant Beauty Therapist	Beauty & Wellness
5.	Field Technician - Other Home Appliances	Electronics & Hardware
6.	Solanaceous Crop Cultivator	Agriculture
7.	Automotive Service Technician	Automotive

## Angh-i Metemneo benjung salem lemsatep

**Dimapur, Luroi/August 7 (TYO):** Nagaland Angh R. N. Ravi-i sangdong ka ajanga Nagaland nung aliba nüburtem aser talisa Yimchunger nung der den Metemneo benjung salem lemsatepogo. Iba benjung amungba mapang Yimchunger nungertemi jenjang menjang taluboa arutsü atema temaotsü meshia amunger. Benjung anogo pongu amunger aser anogoshia inyakyim balala benoka

inyaksangshir. Item inyakyimtem ajanga merekmejua alitsü koda tongtibang iba indang sayur. Benjung amungba mapang kati ka nem tatok agütsüteper aser kibong aser lokti longjemshir, ta Angh-i ashi. "Asenoki iba benjung Covid inyakyim shidak benoka mungdi. Iba bejung amungba mapang ni nisung ajak yimjiyimjung, tepela aser anema alitsü imlaja atar. Tsüngremi Ngaland moajang," ta Angh R.N Ravi-i ashi.

## Mopungchuket nung 'Süngkotenem Angling Festival' Aug 9 nungi akatsü

**Mokokchung, Aug 7 (TYO):** Mopungchuket Community Tourism Society (MCTS)-i kümshi ayongzüka akaba 'Süngkotenem Angling Festival' Aug 9 nungi Aug 14, 2021 tashi Süngkotenem Park, Mopungchuket nung akatsü ta MCTS-i sangdong ka ajanga metetdaksüogo. Shilem aginürtemi ticket-ji Süngkotenem Park nungji dang angutsü, iba ango mesüba benjongji hopta piyong anepdang 5:00 ako nungi nikong 5:30 tashi alitsü. Iba benjong mapang Mokokchung

District Task Force for COVID-19 ajanga koba teinyaksütem latetja lir, item nungdakbatemji benshitsu, ta metetdaksü. State sorkari lockdown özüng salayonga aoba den külemi Mopungchuket village council-ia yimtsüng telungi semdangsemrar aittsü asoshi tenoktangbatem salatsür aser raliwaliba (tourism) maparen tanaben lapokyaong aor, ta kasa osang ajangasa metetdaksü. Tejangrartemiba iba mobile number - 8837323230 ajanga tayongertem tongtetsü.

## Mkg SBI Bazar Branch ghonda 48 asoshi shibangtsür

**Mokokchung, Aug 7 (TYO):** Covid-19 positive putetba ajanga Mokokchung town kübok Arkong Ward nung aliba State Bank of India (SBI), Bazar Branch ghonda 48 khen atema shibangtsür, ta Mokokchung Deputy Commissioner & District Task Force for Covid-19 Chairman, Limawabang Jamir-i Aug 6 nü sangoktsüogo. District Administration osang ajanga ashiba agi, Aug 5, 2021 tashi nung Mokokchung district nung Covid-19 active case-ji 210 liasü, itemji urban area - 126 aser rural area - 84 lir. Medical ketdangtsür kar den iba osangbeneri jembidang, Aug 6 nü Mokokchung Covid Hospital nung parnok 18 aser Mokokchung Covid Care Centre (CCC) nung parnok 8 munga lir, ta ashi. 2021 küm tsüngta nung Covid hospital nung nisung asür ajak agi 31 lir, ta osang angazükter. Ano iba osangbeneria covid-19 vaccine dak sentakba nung ketdangtsür kar den jembidang, Mokokchung district kübok joko yimtsüng kar dak alaka teimba nung vaccine mozü agiogo aser

osang tajung kaji yim 9 bo noklang shilem (fully vaccinated) tongogo, ta ashi. Town (Urban area) nung alirtema joko noklang nung 50% bo vaccine agiogo. Town area nung netsüng yongsük asadagra mozü magirtemji nisung meyi 6 shi asütsü amai asadanteter, ta osang ajangasa angazükter. District Task Force Mokokchung ajanga July 26 nungi Aug 5 tashi Mokokchung town nung dokan amenertem, ku mejepertem, lenmang nung yokshiyokrar, teka mapa balala inyakerter aser temulungertem asoshi Covid-19 random testing aoba maparen ka agia liasü aser iba nungji nisung 597 test asü, aser item rongnung nisung 5 positive puteta liasü, ta osang ajanga angazükter. Random testing aoba mapang liso dokan kiburtem nungi imlaba ama metongtet. Tang ama wara noktangtsü/azüoktsü merangka mapa nung Covid-19 aket/maket jenjang meteter alitsübaji kanga tongtibang lir, ta Urban Surveillance Team-i tebilemba ka lemsatep.

## LCN-i Nagaland sorkar dang pelaba lemsatep

**Dimapur, Luroi/ August 7 (TYO):** Government High School (GHS) Tening, Government Higher Secondary school (GHSS) jenjangi ajungkettsüb atema Nagaland sorkar aser talisa School Education Department dang kanga pelaba Liangmai Council Nagaland (LCN) tir Khenglulo-i sangdong ka ajanga lemsatepogo. Tir Khenglubo-i, Liangmai nungertem aser talisa Tening temeket nung alirtemi mapang talangka nungi iba ya aginüa liasü, kechiyong tanga tesemi yoka pei chirnurtem züngdaksütsü atema tetsükdaksü aika ajangshia arugo, ta ashi. Paisa, iba school GHSS jenjangi ajungkettsüba ajanga lokti nung tebandang kecha makai tangazükter ajak nem kasa maongka agütsütsü, ta ashi. Kasa mapang nung Liangmai Council Nagaland-i, Tening GHS nungi takok tajung anguba

kaketshirtemi school atema dang masü saka iba tesem nung alirtem nem konang nünsang bener arutsüba atema parnok nem tenünsang agütsüogo. LCN-isa, GHS Tening nung tesayurtemi kanga bendanga agüja meranga inyakba atema pamok ajak nem tenünsang agütsüogo. Maneni Khenglubo-i ashiba agi, iba teyari ajanga Government High School Tening temaba jenjangi ajungkettsü atema maongka nguogo. Paisa, iba school ya künübo Tening temeket nung aliba tesemtem aser kidanger state tem nungi kaketshirtemi kaket shisatsü tajungba angazüktsü atema kanga sapua bushiba school ka akümtsü ta ashi. LCN-i, nüburtem atema Tening temeket nung terenlok tali bener arutsütsü asoshi Advisor water resources Namti Nchang tejangraba aliba ngua pa danga kanga pelaba lemsatep liasü.

# CM Biplab Deb tepsettsü merangba atema lanur 3 apu



**Agartala, August 7, 2021 (Agencies):** Tripura chief minister Biplab Kumar Deb tepsettsü merangba ken o nung Police-i lanur 3 puogo.

"Brihostibar aonung chief minister Deb lendong nungi jenbuogo" ta West Tripura district SP Manik Lal Das-i ashi.

"CM Deb-i aonung Syama Prasad Mookerjee Lane nung par kidangi aodang nija gari ka kanga dang kara süi" ta Das-i ashi.

"Iba mapangji CM Deb tezülen jena ao ajisüaka pa indang security personnel tera yiru" ta paisa shisem.

Lanur asemji Subham Saha (27), Aman Saha (25) aser Gairik Ghosh (24) nungertem lir.

Covid night curfew aliba mapang iba lendong atalok. Lanur aseme yi jemer curfew alema senzüba dang masü saka tashiyim agi police barricade 6 adena süi aser police ka dak

teka sangshi. Lanurtemi jena aotsü merang saka police-i Bolero gari sülen anidak aser aonung tesü apu, ta SP Manik Lal Das-i ashi.

Iba atema West Agartala police station nung FIR ka benokogo. Gari mashii aniba, sorkar mapa inyaktertem noktangba, police yirutsüba aser Tripura CM tepsettsü merangba onüktem nung parnok tai tonglokja lir.

# China-i Arunachal lanurtem PLA nung anioknür: Ninong Ering

**Guwahati, August 7, 2021 (Agencies):** China-i Arunachal Pradesh lanurtem Chinese People's Liberation Army (PLA) nung züingsem daksütsü meranger, ta taoba Congress MP Ninong Ering-i ashi.

"Onoki osang angazükba agi Chinese PLA-i Tibet aser Arunachal nungi lanurtem anioktsü meranger. Iba ya tebilemetsü khuret tulu ka lir aser Union Defence Ministry aser

Home-i mapa inyaksüla" ta taoba Lok Sabha MP-i metetdaksü.

China arrtsü anasa aliba Nishi, Adi, Mishimi, Idu nungeri China kübok Lhoba nunger den tesentaktep lir, ta Ering-i ashi.

"Lhoba nunger aser arrtsü anasa aliba Arunachal Pradesh nunger oshi mesüktepa lir, saka parnokki Chinese PLA nung dennür ta masü" ta paisa ashi.

"China-i Bisa nung kiojen

yanglur aser Gehling o Anini nung gari lenmangtem yanglur. Iba ajanga arrtsü anasa aliba Arunachal Pradesh nunger China-i anisatsü akok" ta Ering-isa ashi.

"Ni defence ministry dang iba tebilemetsü süoki ia agitsü mepishir aser asen arrtsü kümzüka ayutsü atema Arunachal lanurtem sepai nung anioktsü atema mapa inyaksü ayongzüker" ta paisa shisem.

# Manipur nungi bener aoba Rs 48 crore alang Heroin apu



Abelen nungi : Mohammad Idrish Ali, Sachin, Mohammad Abdur Razzak aser Shehnawaj.

**Imphal, August 6, 2021 (Agencies):** Hokolbarnü Delhi nung heroin shibelener telok ka makdokogo aser iba mapang heroin seret 12 den nisung pezü apu, ta Delhi Police-i ashi.

Tanü apuba heroin indang jenjangji Rs 48 crore shi asütsü.

Delhi Police indang special cell-i iba mapa tongti süa inyaker Mohammed Abdur Razzak aser pa den yaritepertem Shahnawaz Hussian, Sachit aser Mohammed Idris Ali nungertem apu.

Iba teloki amshiba truck aser scooty ka puogo, ta police-i ashi.

Tesüiba küm 3-4 shi ka pa Manipur nungi heroin bener arutsü atema aiben ao aser heroin ji gari nung miima khu

abenba ka nung enoker bener aru ta Shahnawaz-i police dang nangzüko.

Paisa Assam kübok Guwahati aser tanga tesemtem nung shishilembatsü atema anen, ta Shahnawaz-i ashi.

"Tawa apuba nisung kar dang asüingdangya asüidang kuli kar ngutet aser iba nungji ajemdaker nisung pezü puogo. Ozüing alema bener aruba mozütemji India nung northern state tem nung ayoktsü atema liasü" ta Special Cell DCP, Sanjeev Yadav-i osangbener dang ashi.

Heroin bener aruba tesemtem ta temolung meleme bilemba rongnung Afghanistan dena lir, ta paisa ashi.

Taoba küm 3-4 tsüingda Manipur-i heroin bener arur. Iba state ya Myanmar den arrtsüa lir aser idak nung jagi Uttar Pradesh-i belener aser iba sülen linük kübok tesem ajungalen belenshir ta DCP Yadav-isa metetdaksü.

Nisung pezü telok ya Manipur nungi low-grade heroin bener arurtem lir aser parnokki Delhi tonga bener aruba sülen tajungba küma yanglushir National Capital Region (NCR) aser Uttar Pradesh nung ayoker, ta paisa ashi.

Manipur nung heroin suppliers ji Myanmar den arrtsü aliba tenemlen jenoka lir ama temolung malemer, ta Delhi Police-isa metetdaksüo.

# ASENOK AJAKI SHILEM AGIA COVID-19 WARA NOKDANGDI

**Nisung Kar Covid-19 agi shirangba yimya tem lira:**

- \* Covid-19 test magi tashi, Kidang kinunger nungi pila-a liang.
- \* Memenui Covid-19 test arua agitsüla.
- \* Kasa anogo nung tanungba kidang alir tem ajak test asütsüla.
- \* Tanur küm ana (2) tekübok Covid test asütsü menüngtaker.
- \* Kidang kiyonger aser kinungertem Covid agi shiranga alir kar ajurua lira memenui Covid test asütsü ajungshiteptsüla.

**Covid tashitak menatsüsa lendong bang nung alirtem asoshi - covid positive den ajurua lira -**

1. Mask makei jembishinüba.
2. Mapang talangka kazüba.
3. Soushi nung kongshiba.

- \* Pei sasa isolate asütsüla(tangar dang nungi pila-a alitsüla)
- \* Covid test asütsü atema Doctor mesüra Medical Control Room den anogo mapang latettsüla.
- \* Covid test osang maru tashi, pe sasa isolate süa atatsüla.

**Kicha shia-i teinyaktsu -**

- \* Kidang mesüra hospital nung shiranga alirtem kuli tejangja memeteti mashi mesem dangtsüla.
- \* Nüngdak tulu makara yimdongi mayazüktsüla.
- \* Lokti adenshiba nungi pila liang. (Eg, funerals, sati benjong)
- \* Teti Mask inokang, teka shidokang aser tetsungda yuang.

**Temalen agüja aliba temetetsü yimya tem benshiba ajanga Covid-19 tashidak wara prokshiba nungi anendaksütsü.**

- Chief Medical officer office., Mokochung

# Assam nung Mizoram-i aoba gari 4 amak



**Guwahati, August 7, 2021 (Agencies):** Assam o Mizoram arrtsü tensa mejungi aliba mapang Mizoram-i chiyungtsü abenba garitem Bhaga Bazar area nung amak.

Hokolbar aonung Assam kübok Cachar district nung iba ya atalok.

Nisung telok kati garitem raksatsü aser chiyungtsütem asaa raksatsü ta osang angazüker. Iba lendong atalokba sülen police telok ka tesem tonga ao.

Assam aser Mizoram tsüingda arrtsü angatetteptsü molungtepba sülen iba ya atalokogo.

Külen, Axom Nagarik Samaj-i Assam aser Mizoram dang rongsenketzüng mokdang agientsü ayongzüko.

"Mepetmesü adokba sülen Mizoram-i aoba gari ajak arrtsü nung anendakja lir. Iba ajanga Mizoram nung supply shitak mali. Tanü tashi Assam aser India sorkartemi mokdang anendaksütsü atema kecha meinyaker" ta Axom Nagarik Samaj-i metetdaksü.

"Rongsenketzüng mokdangba ajanga kecha tajung bener marutsü. Iba mokdang agientsüla aser Mizoram nunger tim metemdaksütsü atema garitem yoktsüla" ta parnokisa ashi.

# AGP lennir kidang petrol bomb pokdaksü

**Guwahati, August 7, 2021 (Agencies):** Hokolbar aonung mejangjatetba nisung kari Assam Gana Parishad (AGP) lennir ka kidang petrol bombs pokdaksü.

Aonung 9:00 ako meta parnokki AGP lennir Ranjit Deka'er kidang bomb pokdaksü. Pa ya Pathsala nunga educationist ka lir.

Taoba Assam Assembly elections nung Deka-i AGP ticket amer toktep saka tamakok angu. Pai Pathsala nung Anandaram Baruah Academy lapoka lir.

Lendong atalokba mapang Deka kidang maliasü saka par kinungertembo liasü.

Superintendent of Police

(SP) Dharmendra Das-i nir police ketdangsurtemi par kidangi oa bushisüingdang süogo.

Aonung 9:30 ako memetetba nisung kari Deka kinungtsü dangi phone asü aser parnokki akhangbatem inyaksü ashi ta osang angazüker.

Ajisüaka, Deka'er kibong nem kechi takhangba agütsü'ar memetet.

"Petrol bomb pokdaksüba sülen ghonda tesadang ka lir Hindi oshi jembir kati kü dangi phone ser takhangba langzüksü ashi. Ni pa dang takhangbaji kechisa ta asüingdang dang pai ano phone asütsü ta ser phone ayu" ta Deka kinungtsü Nandita Barman-i ashi.



## TIR YIMYIM YIMOBILEM (EDITORIAL)

DIMAPUR AMUNGNÜ, LUROI(AUGUST) 08, 2021

### Ajak asoshi tanüla sempet

**Y**isui Nikodima dang ashi ama, asenok alima nung tetsü bok nungi alubaji shi nung asoba lir, anungji tanüla nung tanaben asotsü nungdaker, kechiyong nisunger shisatsü aser sempet tapu balala bener alima nung aientsü tenzük dang, asenok taküm ya tangar asoshi temoatsü asütsüba ser nung temetsüdaksü long ama ka dang kumadoker. Idangji, asen taküm yimya aser libaliro karbo lokti aser arogo nung mapet akümer, anungji asen dak tangar metsüdaker. Anungji, asen dak tangar metsüdaksü alitsü agibo asen tekong nung longpak ka alenloker tzüim tarok nung pongoka asü tajungba ta Yisui ashiba asenoki Mathi 18 aser Luke 17 nung angur. Tatishitsü agi, asenoki asen achiajem aser jembishinü nung mazüoktetba ajanga tangar jashidaksür. Mesüra shi azü nung mazüokba ajanga asen dak tangar metsüdaker. Joko, asenoksasa asen taküm mazüokteti tim masüba mapatem inyaka asenok alir. Aji oda, tanü lima nungbo kibalembuba tsütsüa kin kidong mashishibajibo yutsür tetsür o tetsür na aser tebur o tebur na apuani kuma alir. Itemji tetsübok nungi aludangyongi keter aluba jakla yimyatam amato asenoki agir mesüra kibong nung tim tesayuba agüja manitetba ajanga yamaji kumadokba nisung amato asenoki bilemer, anungji item taküm yimyatemji melenshitsütsü makoker. Aji oda, melenshitsütsü melen parnok lenchi jagiang oa arogo tashi nung item sobalibatemji tim sobaliba amato agizükba putu ka nung asenok alir. Kodang asenoki Yisui Nikodima dang Tsüngremi yimli ngutettsü atema tanaben asotsü nungdakba indang ashibaji tanüla nung angatettsü merangdir, atangji asenoki shi nung melenshitsü makokba jakla yimya aser sobalibatemji melenshitsü atema tanaben soshitsübaji kanga nungdaker ta angatettsü. Tanaben maso tashibo kasa nisung aser kasa jaklaji dang asütsü. Ajisüaka, kodang asenok taküm aser temang tejenba ya Tsüngrem nem bendanga agütsür tanüla nung tanaben soshidir, idangjisa asenok dangi tanüla temeshi arur. Iba tanüla temeshiji asenok nem agütsüba Tsüngremer sempet lir. Ajisüaka, iba sempet yabo tanga alima sempet amato oset ka masü saka Tsüngremi Pa taküm asenok asoshi Pasasa agütsüba temeim sempet lir. Anungji, kodang asenok tanüla nung tanaben asor aser tanüla temeshi agizüker, Tsüngrem asen dak alir aser tanüla temeshi ajanga anguba tanüla sempet agi Tsüngremi mulungba mapa inyaksü tenzük. Atangji, Tsüngrem tanülajibo ka dang saka Pai agütsüba sempetjibo aika, anungji nisung shia nem Pai tanüla sempet balala agütsür ta 1 Korint 12 nung shia aliba asenoki angur. Aji oda, kar nem shisatsü, kar nem temetetba, kar nem taneptsü, kar nem sayatenya mapa inyaksü ain, kar nem sayutsüngitsü, kar nem tarutsü tia shitetba, kar nem oshi tapu tapu jembitsü aser kar nem item ratettsü ta tanüla sempettemji zünger mezüngma saka item sempettemji Tsüngremi nisung shia nem balala lemsaa agütsür. Ano, tanüla sempettemji amshia tenzüksü asoshi yimten, arogo aser lokti nung tenzüksü wadang balala lemsütsür, saka kasa Laishiba tapu nungji ashir, item tenzükba wadang ajak madak kiburjibo ka dang, aji tematiba Tsüngrem. Item tanüla sempet aser tashiji asen taküm ajanga nisungtem rongnung jungkai adoka amshir. Ibaji asen taküm tanüla nung tanaben asoba tamaitü lir. Anungji, 1 Korint 12:7 nungji ashir, asen taküm nung tanüla temeshii agütsüba sempet amshibaji asen kija ajungtsü atema masü saka ajak ajungtsü aser ajak ajangzüksü asoshi agütsü. Ashiko, asenoki aji mangateti asen nem Tsüngremi agütsüba tanüla sempet aser tenzükba wadang ya asen kija ajungtsü aser ajangzüksü agütsü ama bilema pei ajangzüksü asoshi dang amshia alitsüa akok. Ajisüaka, asen taküm tilaka ya arogo, yimten aser lokti nung züngsemadaksübaji asen dak aliba tanüla temeshi ajanga agütsüba sempet agi kulem lisemertem temoatsü aser tajangzük ngudakja tenzüksü asoshi agütsüba maongka ta asenoki bilema tenzüksüla. Asen nem agütsüba tanüla sempet ya tangar asoshi mapa tajung ka inyaksütsü hadir ka amuoktsüba amai lir, anungji iba tanüla sempetji agizüker mamshii ayutsü makok. Ibajibo asen Tsüngrem tsüngdang sentsü tulu asütsü. Ibaji bilema, tanübo asenok dak aliba tanüla temeshii agütsüba tanüla sempet ajanga tangar kwi ajangzük ta asenoksasa asen dang asüngdangdi. Nisung shingai kü nembo tanüla sempet magütsü, nibo tanüla sempet maka ta ashitsü makok, kechiyong Tsüngremi mulungba nung nisung shia nem kasa tanüla temeshi ajanga tanüla sempet balala agütsür ta 1 Korint 12 :11 nung angur. Asen mapaji asen nem agütsüba tanüla sempetji jangjatsütsü aser tangar asoshi temoatsü kuma amshitsübaji asütsü.

## OLEMSABANG

Asangur ka aser Aier ka taküm nung Tsüngremer Sentongtem ataloka aoba indang otsü tatsüka lemsateper

~ R. Imkong Lkr, Mangimen

(Yashi adok nungi...)

Iba sülen tu lai künaprongla atema süngo tajung renema bener arua agütsüji medemer kena tu aji jema kazüa alitang taoba mapang nung par classpurtem tua komasa litepdar na? ta jembitepa liasü, aser ano tanga otsüa kar atongtepa mapang talangka mentepa kazür kelen Asangouba jagi ashi, tanübo jangratema süngo-a jemogo aser tanga otsü-a atongtepogo taji yaser ang anosa ajurutepti ta shia nokdaka alitang, Aierla jagi pa anasa aruagi pa ket nung ammeter ashi, ano khen tatsüka mena liang ta shir la tu yakta oagi surujoka akaba tu auso tuluka nung chi aser aoun peria enoker bener aruagi amendaka ayu, aser Asangouba dang teka metsükang ta ser tzü agütsüji ni tekaji metsük, aser lai ashi, ana külemi aousu ka nungji chiyungdi ta ashiji yabo odangbo masü ta tera ka akmesena chiyunger kelen ni aotang lai leman nungji tatsüka meinoktsü. Iba sülen tubo tena tu kanga meimtepa aküm, aser mapang talangka melie tang tena tu kibong akümtsüba mapangi bener arutsü. Idangjibo Asangouba tu telongi aitsü "underground" maparen indang tu tejangraba anena tok, aser Aierla tena kibong akümtsüba indang tu shisabulua, koda asütsü ta bilema liasü, kechiba ta süra tenaprongla ya sensaker kibong nungi intetba nübu ka ka asünung tena ket nung kecha mekai lia kibong kumatok. Aser tena tu anogo shia chiyunga jema liyonga aotsü atema mapa tila tari karbosa inyaksüsa aküm nungji kinüngbo tu tangar takar aser tulur mapang nung Hajera oa sen-o-tsü terara bener aruba nung jagitang par kibong mesüa liyonga aoba mapang ka nung Covid-19 tashidak wara agi alima ajonga nung nisungtem aika shirangtepa den ano tia makar kibong kar nungbo tasü tama ajurua aotang Govt.- iba waraji tali ayimsünga prokshia moutaktsütsü mechi nung "lock down policy" tenzük, tetezü nüburtem mapang tatsüka atema shinga yimdongi moutaktsü shibanga yua liasü. Idangjibo tena kibong atema tebilemsü tulu agi tongatok, kechiba ta süra tena atema tu Hajera aodak mekai kumatok, aser ano iba mapang nungjisa tena atema tia kar maka ka, tena nem tanur tebour chanu ka moatsü, saka chia ajemtsü peria makaba mapang ka nungang yamaji ataloka ata nungji, tena tu kanga shisabulua alitang kiyonger kidangertemi tanur tebour chanu ka asoba tu angashia kari chiyungtsü tajung den An tulu lu pua bener arutsü, aser kari tanur atemaji aben-sü-o-shi tajung aika den jang konü aikasa bendentsüdang tena tu kangasa pelaa liasü, saka kelenbo tena dang temeim sayubaji kanga akmesenasa bilema liasü, kechiba ta süra, tenatibo shinga dang mapa tajung inyaka maka. Saka sa tena kebong nung kecha mekai timtema alitang temeimertemi kechisarena bendentsüba ajanga tena tu kecha nunga timtem mekai sünep sünep tepela nung liyonga oa liasü. Aji saka tena kibong nung tu anogo aika atemabo chiyungtsü peria rizünga maka nungji tebilemsü tulu agi sünger shisabulua alitang, par Ak tila ka metsüa aliba jagi chi tanen maka meshia asatenba agi kinüngbo-i par kiyonger kidanger dang nungi parnok chinüng onüng bendena bener aruagi Ak la nungji chiyungdakjasa liasü. Saka Akla jagi chi chiyungzük tatsüka tang lirbo ano tanen mekai anogo tepiyong asatenasa liasü, kechiba ta süra tangar kidang nungi chinüng onüng tilala bener arua agütsüba jagi tebok masüngerji ano tanen mekai asatendang khen khen Bass ola adokle, khen khen Suprano ola adokle, khen khen Alto ola adokle aser khen khenbo Tenor ola adokle ta asatenba ola tu talaktsüka angashidang kinungtsü-i yamai shia liasü, asen Ak tinla yagibo ola tabensa aikasa atokteter ta ashitang, kinüngbo-i lai ashibaji mangashi ama tang doktsü aser Akla tangji yamai shia liasü, Akla! Na yaa tera tali asatener aa jai, tanü obula o otsüla na chiyungtsüa sünga anarongtena tangar temeimertemi bendentsüba agi chiyunga jema alir tang ago, ibaji naibo memetet südi tu? Yamaji onok timtema alitang koda ser ne nem chiyungtsü kwiben agütsütettsü? Anungji yimlibilema ola yamaibosa melenshia tatokma ta shia alibaji par tantsü-i angashi, aser memeteti ka lai ola tashi agi adoka ha, ha, ha, haa ta jangratema menüloktsü-ji yabo tera balaka menüteter ta par tambo jagi bilema liasü. kechiba ta süra tena kibong kümer jok mapang tatsüka liyonga aor, saka kenü tanga lai iba amaibo ola tashi agi adoka menüa mangashitangba tang bai mezünpuba angashidanger asünungji kinüngbo tu ang tepelaba liasü ta otsü jagi ashir. Iba ama menüba ya tena atema kibong nung "Chatra" tajung "Good Luck or Good fortune" tetenzükberba liasü, aser iba sülen tubo kobie melie tang tenaprongla mapa tajung ka ka nung iteta tok, aser yimertemi tena kibong jangratema liyonga aoba angudang kanga nükshia repranga liasü ta otsü jagi ashir.

Yamaji par yimtsüng nungji school ka lapoka akaba nung tu Headmaster-ba melena inyaksü atema yimsüsürtemi Govt. den tongtepa jembitepa or kelen la kinüngbo tu mapang nungji aniok, kechiyong pa kümji Headmasterba tu mapa nungi pension adoka liasü. Aser kibutsüla tua par yimtsüng nungji Arogotsür Secretary shima liasü, iba denji repsema Sunday School tesayur incharge shima liasü. Par apuni ya nübur ajaki sapua aginüa aliba nübu ka ka liasü, iba denji tenaprongla ya degree tajung akaba nübu tajung ka ka liasü. Par apuni ya Tsüngrem akhüm tsüba, nübur ajak den liro medema litetba nübu ka ka liasü, aji oda tena prongla yimtsüng ka nung külemi lia mapa tajung ka ka ngutetbaji Tsüngremer sentong liasü ta teselenang meteta aru. Isaia 55:8 yamaji shirnokisa Tsüngrem akhüm tsüba ajemalua lidir, tatem nung tia tajung agi melentsür ta otsü jagi kuli tajung sayur.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir**

## Liangmai Baptist Association-i Clean Election mapatong tenzükogo



August 06, 2021 nü LBA Headquarter Tening Town nung Liangmai Baptist Association (LBA)-i Clean Election Movement (CEM) tenzükba sentong nung LBA staff tem aser sorkar ketdangsertem külemi tangokba noksa nung angur.

**Dimapur, August 07, 2021 (TYO):** Nagaland Baptist Church Council (NBCC) lenisüba kübok August 06, 2021 nü Liangmai Baptist Association (LBA) nunga parnok indang Headquarters, Tening Town nung Clean Election Movement (CEM) tenzükogo, ta Media Cell LBA Tening, Rutmakbo-i sangdong ka ajanga metetdaksü.

Iba sentong ya Baptist High school Tening nung agia liasü.

Baptist High School Tening nung Head Master, Kinkhambo leniba nung iba sentong agi; Women Secretary LBA aser Clean Election core Committee züngsem, P. Azon-i okila jembü aser Extra

Assistant Commissioner (EAC) Nsong, Yimkum Ozukum-i NBCC-i CEM mapatong tenzükba mapang nungi tenzükba iba mapatong shidak inyaka aruba indang lemsatep.

Yimkum Ozukum-isa, arrshi küm 18 ser temapur ajaki vote agüja yimsüsütsü atema lenirtem shimtsü asoshi temeden lir, koba ajanga loktiliba nung temelenshi aser terenlok bener arutsütsü, ta metetdaksü.

Extra Assistant Commissioner-isa, Naga nungeri election mapang nung tim masüba mapatem ajak indoktsü nüngdak, ta ashi.

Tening Village Baptist Arogo nung pastor, K.Lailubo-

ia Khristan ka ama tangatetba shidak nung inyaksü aser temenen mapatem mebenshitsü metetdaksüba den külemi züngsemtem dang tasü itta ochi jembitsü aser ochi nung nokdaksü ayongzük.

Tening Town Women Wing Organization Tir, Champhung-i, election timi ochishia agitsüla aser ozüng alema inyakterem nem manishidaksütsüla, ta ashi. Laisa, Clean Election movement tenzükba ajanga nüburtemi iba mapatong nungittsü, ta ashi.

CEM mapatong tenzükba Liangmai Baptist Association (LBA) Executive Secretary, Rev. Kitanwi Chawang-i sarasadema liasü.

## Tesüiba küm 12 tsüngda Nigeria nung Khristan 43,000 tepsetogo

**August 07, 2021:** International Society for Civil Liberties & the Rule of Law (Intersociety)-i Nigeria nung tesüiba küm 12 tsüngda Khristantem anema inyakba indang report tejangja sangdongogo, ta International Christian Concern-i metetdaksü.

Intersociety report nung shia aliba agi, tesüiba küm 12 tsüngda Nigeria nung Islam yimsü alia amangertemi Khristan 43,000 dak tema tepsetogo, Khristan 18,500 shi samaogo aser Tenla ki 17,500 dak tema amakba den nisung million 10 jenshi aser Khristan school 2,000 shi maakogo.

2009 küm July ita nungi 2021 küm July ita tashi nung (küm 12) Nigeria nung Islamic kiralongrarterem aser Islam yimsü alia amangertemi Khristan 43,000 dak tema tepset, aser iba nungjagi shilem 20 (Khristan 8,600) bo Church of Brethren in Nigeria (EYN) nungi züngsemtem liasü, ta report nung shia lir.

Nigeria nung Jihadist teloktemisa mamangertem (Khristan) den amalitepa alir Muslim nunger anema inyaker, aser ibaji linük nung Islamic

Sharia ozüng benoktsü nükjidong nung inyaker, ta kasa report nungsa shia lir.

Jihadist telok balalai Khristantem meyong kiojen, tekülem kitem, Khristan shisaliok rejutem, ali, alu aser arem raksatsür; Khristantem reshikangshir, yimya balala nung tepsetter, puer aoer aser kangshia Muslim nunger den kibong kümdaksür.

Küm 12 tsüngda nungsa Northern Nigeria nung Khristan million trok jenshiogo aser iba nungjagi million pezübo IDPs kümogo.

2009 küm nungi tenzükba taküm July ita tashi nung Nigeria nung Jihadist telok balalai nisung 36,000 shi apu, aser iba nungjagi nisung 18,500 bo Khristantem liasü. Jihadist teloki apuba Muslim nungerbo aika chiokadoker saka Khristantembo aika tepsetter mesüra kangshia Islam yimsü dangi meyipdaksür.

2014 küm Chibok nung Boko Haram teloki tetsür 276 pua liasü, aser iba nungjagi tetsür 217 bo Church of Brethren in Nigeria (EYN) nung züngsemtem lir; parnok tang tashi pua lir aser parnok aika Islam yimsü dangi

meyipdaksüba sülen Muslim nunger den kibong kümdaksüogo.

2008 küm nungi tenzükba Intersociety teloki Nigeria tesem ajaklen tamangba yimsü nung ajemdaker reshikangshiba aser meimchir temeden alema inyakba mapatem bushisüngdanger, aser osangtem bendener.

Nigeria nungsa Muslim nunger minorities, talisa Shiites mesüra Islamic Movement in Nigeria (IMN) anema inyakba osangtema Intersociety-i bendener.

Taküm July 18 nüa Intersociety-i report ka ajanga 2021 küm tenzükba mezüngbuba anogo 200 (January 1 nungi July 18) tsüngda Nigeria nung Islamic Jihadist telok balalai Khristan 3,462 tepsetba report ka sangdonga liasü. Kasa mapang nungjisa Khristan 3,000 dak tema apu, Tenla ki 300 dak tema amak aser putir 10 puer oa tepseta liasü.

July 19 nungi August 4 tsüngda nunga Jihadist telok balala, talisa Jihadist Fulani teloki Plateau, Benue, Southern Kaduna aser Enugu State tem nung Khristan 150 dak tema tepsetogo.

## ANOGO ABEN TSÜNGREM DEN

## PAI ABENSATSÜTSÜ

"Kechiyong shiba nenok dak mapa tajung tenzük, pai Yisu Khrista anogo tashi ajisa abensatsütsü ta ni amanger." Filipi 1:6

Tanur asüdang atenba English ken ka asenok aikati bilemtettsü südi-

"Pai ni tang tashi yanglushidar

Ni tajungtuba akümtsüba atema pai hapta ka nung dang ita aser petinutem yanglu

Paji koda temeim aser tatasa aliba Tsüngrem Kechiyong Paik ü dak tang tashi mapa inyakdar."

Asenok tanü tashi shinga tabensa mali. Saka Pai asenok senzükba meyutsüi, tanü tashi asenok dak temelenshi kechi nungdaker itemji pai repringshia asenok yanglushitsür. Pauli Filipi nung ashi amaji, tetenzük nung Tsüngrem asenok 'tajung' yanglu koba temeneni raksatsü. Pai tenzükba mapa kaji tatem tashi, tabensa maküm tashi, pai mapa inyaksü ta ashir.

Asen dak kechi agi tabensaba mekümdaksür, mesüra tobur mejungdaksür ibaki, Teyanglusangi maneni jungjunga kümdaksütsü. Asen dang Pa nem bendanga, temulung lema atar matar ta dang ati!

**Sarasadem:**

Poteper na, O kibuba, nai ni yanglushijangma. Amen

## ABAM Mission shisa lemsatep sentong agiogo

**Mokokchung, August 07 (TYO):** ABAM Mission level tashi nung tenyaba mapa inyakba nung, Shisa Lemsatep Sentong asenoki parnok sasa August 3-6, 2021 lenisüba agitettsüba anogotem nung Impur aser achaayangtettsüba nung telok ana lemsar tesayuba agütsütsüji kanga takok ngua asen nükjidong asünung agiogo; Arogo 41 nungi dang mapang tatsüka Sannükertemi anir nung ano tesem tasen toklang tenzükertem, kati osang tajung bener mission board aotsü lenmang adoktsü züngsemtem, deacon ta shisalen sayurtemi ajak senteper nisung sayua liasü.

101 arua iba sentong Asenoki aahba asenok nung aden, ta Executive asoshidang mesüi Secretary, ABAM, Rev. tenyaba mapa asoshi-a Dr. Mar Pongener-i shilem tila kabosa ajaki sangdong ka ajanga tenyaba mapa asoshi metetdaksü. amshi nung asen Ao Tanü tensa-i aginuba Arogotem aser ama SOP shitak Mungdangi ano wadang amshitetsü asoshi iba tuluba inyaktetsü ta sentong telok ana sensaksem tajung aka lemsaer agi. Iba sentong Arogo nükjidongji nung Shisalen Sayur tenyaba mapa asoshi lir, Rev. Dr. Mar Pongener aser tenyaba mapa Executive Secretary, meinyakra asenok Arogo ABAM, Mr. Lipokwati alibaji tetezü maka. Lemtur, Mumbai, Rev. L. Anungji tanü tatembang Yapang Mollier, ka atongtsü asoshi Secretary, ABAM Church ariteper ama tensa ka & Mission aser Rev. Lipok nung ajaki Khrista osang Pongen, AIM Coordinator sangtongtsü asoshi nunger liasü. temulung agütsütsü tang mapang ya lir, ta

Iba sentong ya tanü asen ABAM aser Lim shisalen sayurtemisa Arogotemi tenyaba mapa tatem nung tesayuba inyakba nung koda tajung agüja ajak inyaka arudar, kolen temoatsü nguogo. inyaksü, koda inyaka Maneni ABAM, aotsüla, kobika Arogotem, aser kija-i inyaksü, ta shisa tenyaba mapa inyakdang lemsatepba sentong ka tanela temeshi tadenba lir. Iba sentong nung nung inyaksü ABAM tongtibangsa, tanü sarasadem ayur, ta Rev. ABAM aser Lim Dr. Mar Pongener-isa Arogotemi International metetdaksü.

OLONG PAITEP # 5899

Grid for OLONG PAITEP # 5899 with numbers 1-17 and shaded cells.

TIPILEN and LANGTSÜNGLEN lists for OLONG PAITEP # 5899.

OLONG PAITEP # 5898 TELANGZÜBA

TIPILEN and LANGTSÜNGLEN lists for OLONG PAITEP # 5898 TELANGZÜBA.

KOMA SÜLA TELANGZÜBA

Q. Mizoram aser Assam arrtsülen atalokba ama Nagaland aser Assam Police na ta arrtsü raktepa khattep nunga koma süla?

Mizoram aser Assam den asenok kasa masüah ta angatetra aji teperi. Asenoki ajemalua repranga alidang parnok o parnok mangatetep tulu adoka khatepa sümatsüsa tamang-ang nungdaker. Aor-i aji-oda meinyaktetra asenoki khangzükba pioneer nungja jia meyipa agütsür tajungba süla. Kechiaser, Nagaland nung ajak nung ajak pioneerjibo Tsungrem lir.

-C.R.pongen

Asenli kümzüka ayutsüji senso ka shilem anungji Assam nungeri kanga katepnera katepyonga junger, saka asenok Assam majangi senzütsü lenmang tama renemtsüla.

-SMS

Mizoram artsü nung Assem police noklang ana dak tali aruba Mizoram police-i Assem police terok 6 kasetba ya Nagaland police asünungbo noklang dak tema kaseter lila, kechiyong Nagaland police aser Mizo police na kenyongi balala ibala tangar den raratsü nungbo India nung asenok Nagaland police state aikati memeneptsü raratsü hadir tajung tang lirbo Nagaland police kanga temulong lema belimer

-ns jr

Inyak nung kanga ajungtsüba asü saka yimjung yangluatogo ibaji dang kanga junga azüoka sorkari repringtsü junger.

- SMS

Prangpong amertem tashi koda masüji hokom angütsü Ready. Minister, MLA aser public leaders ajak pei kinungtsü süpok nung atsükadoktsü. Tanungba nung jagi ajungbena kar shirangadoktsü. Joko tia maker ali kibur kar denbo tetsur tanurdang kar asadena angütsü.Tamasha ulura.

-Mar. Naharbari, Naharbari.

Asen Naga lima nungbo tang Mizoram o Assam ama ka atalok asübo asen Nagaland police noklang nung neter pungu (75%) sür lila. Kechiba süra asen minister tembo gari dang tajung kodaser alitsü ta dang bilema alir nung koda. Asen sepai prangpong tajung ka ta mali nung kodaser tangar akoktsüba. Gari tasen jagi khatetsü masüji oda asütsüba danga to ya ta nibo bilemera no.

-O. Jamir, Kma

Arrtsü raktepa Nagaland aser Assam na khatetpütsü, kin ana nungi nisung aika taküm samatsü akok ajisüaka lenmang ajak nung Naga nunger takoksaba akoksatsü aser timtema asenokang tim atemtsü. Akok tashi yimjung nung lemtepratemsüla.

-A. Moa Pongen. Kma

AO OSHI ANGAZÜKDAK:

TANÜ ANGAZÜKTSÜBA OJANG



Kiyi

(n) ali nung per ama juzüba shiruru (earthworm)

\* Kiyi-i atsü nung anakawa achir aser item jagi ali temo kümdaktsür.

Kiyimki

(n) kibong kümer alitsü ki tasen asüba (new house constructed just before marriage)

NAI-A YA METETTER MA?

Taa timtiba angur actor rongnung Vin Diesel ka asütsü aser ajaki sapuba action franchise "Fast and Furious" nung pai Dominic Toretto ama shilem agiba atema alimai pa tali jangjaa aküm. Iba franchise nung inyak tenzüker külen nungi Diesel-i million tema aazüka aruogo. 2001 küm sayaba "Fast and Furious" film atema Diesel-i dollar million 2 shi aazüka liasü. Franchise takok ngua aoba den külemi Diesel indang taa timba aküm aser tawa sayaba "F9" film nung pai dollar million 20 shi aazükogo. Fast and Furious dak alaka, Diesel-i Marvel indang "Guardians of the Galaxy" film nung 'Groot' ama pa ola agüja shilem agiba ajaki jangjaa lir. Iba film nung Diesel-i o kanga mejembir aser "I Am Groot" o atema pai dollar million 54 aazüka liasü.



TANÜBO NAI LANGZÜANG

Q. Munich 1972 Olympic Games indang official mascot koba liasü?

A.Schuss

B.Waldi

C.Fuwa

D.Amik

(Taruba adok nung onoki langzüksü)

YASHI ADOK TELANGZÜBA :Madhya Pradesh

SUDOKU # 5939

Sudoku grid for # 5939 with some numbers filled in.

TELANGZUBA # 5938

TELANGZUBA grid for # 5938 with numbers filled in.

OJANG LUTEP # 5484

- EPI : [ ][ ]
NÜTEK : [ ][ ][ ][ ]
UNNG : [ ][ ][ ]
NAAK : [ ][ ][ ]
RYU : [ ][ ]
GARTAN : [ ][ ][ ][ ][ ]
NÜKTE : [ ][ ][ ][ ]
NGNU : [ ][ ][ ]
AANK : [ ][ ][ ]
USHTEBI : [ ][ ][ ][ ][ ]

OJANG LUTEP TELANGZÜBA # 5483


TSÜNGREM INDANG BUSHIR DANG NUNGI TSÜNGREM BUSHIRI TAMA KOTAK ANGÜTSÜ

TAN HOPTA ATEMA - KOMA SÜLA ?

Q. ABAM kübok arogotem nung sannükertem ya ABAM-i dang shimer mapang mapang shia, government mapa inyakertem amato, mapang apir arogo balalai transfer and posting yoka tenzükdaktsü nunga koma süla ?

Olong 20 shi nung August 13, 2021 tashi nung iba telangzüba ya onok dangi (e-mail - tiryimiyim@gmail.com) :

(SMS - 9856121232 / 9436072422) : (WhatsApp - 7005723372 / 8729995804) : (tiryimiyim.in) ajanga yokang. Telangzubatemi taruba Honibarü adoktsüsü.



August 07, 2021 nü New Delhi nung Nepal Government Muslim Commission Chairperson, Samim Miya-i Union Minister for Minority Affairs, Mukhtar Abbas Naqvi ajurua senden amendang tangokba noksa nung angur. Iba senden nung India nung loktiliba, rongsenketsüng aser shisaliok dak sendakba mapatong balala inyakba indang lemsatepa liasü.

### MP nung tzümetzüng nung ni nisung 8,832 kümzükogo: CM Chouhan

**Bhopal, August 07 (Agencies):** Honibarnü Madhya Pradesh Chief Minister, Shivraj Singh Chouhan-i, state nung tzümetzüng agi kongshiba tesemtem nung tang tashi nung nisung 8,832 kümzükogo aser nisung 29,280 ainshidaktsüogo, ta metetdaksü.

Honibarnep 'Anna Utsav' sentong nung jembidang pai iba osang ya metetdakja liasü.

State sorkar ketdangsertemi ashiba agi, Madhya Pradesh kübok Gwalior aser Chambal divisions nung tesüiba anogo ishika tzünglu maneni aruba

mapang tzünglu dak sendakba lendong balala nung nisung 12 süogo.

Chief minister-i twitter ajanga, Honibarnep-a tzümetzüng agi kongshiba district asem nung nisung 40 shi kümzükogo, ta metetdaksü.

"Tanep ni Guna, Ashoknagar aser Vidisha district tem nung tzümetzüng tensa asadangba den külemi kümzükba maparen inyakba osang metetpelaogo.

Tanep nungi tenzüka IAF-i kümzükba maparen inyakdar. Tzümetsüng agi kongshiba yimsüngtem nung yasüng nungi SDRF aser NDRF-i kümzükba

maparen inyaker," ta Chief Minister-i metetdaksü.

Helicopters amshia kümzükba maparen inyakba mapang nung Ashok Nagar district kübok Barri aser Sirsora yim na nung nisung 30 kümzük. Kasa district kübok Vasunia Ghat yim nunga nisung trok kümzük aser Vidisha district kübok Riniya yim dak nisung trok süngdong talak nung lia kümzükogo, ta Chief Minister-isa metetdaksü.

Guna district kübok Sondha yim dak nunga kümzükba maparen inyaksü atema helicopter ka yokogo, ta paisa shisem.

### Mamata-i PM dang Electricity (Amendment) Bill magizüksü mepishi

**Kolkata, August 07 (Agencies):** West Bengal Chief Minister, Mamata Banerjee-i shidi ka ajanga Ato kilonser, Narendra Modi dang, Electricity (Amendment) Bill 2020 ya nüburttem anemba bill ka lir, anungji iba bill ya magizüksüla, ta mepishi.

Mamata Banerjee-i, iba Bill ya yaküm benoka liasü, ajisüaka Trinamool Congress-i ashishiba agi iba Bill magizük, ta metetdaksü.

Electricity (Amendment) Bill 2020 ya agizükra iba bill ajanga Electricity Act 2003 melenshia power sector tsütsü state aser central departments nung ozüng tasen aika benoktsü.

Tang state electricity regulatory commissions

(SERC) shimtsü atema temeja selection panel ka lir, ajisüaka 2020 amendment Bill ya agizükra National Selection Committee ka tentetsü.

Iba bill ya agizükra power ayokba, alizükba aser transmission contract ajak ketdangsiu reprangtsü atema Electricity Contract Enforcement Authority ka tentetsü. Iba bill nung Direct Benefit Transfer (DBT) alitsü atema benoka lir; tajangzük angutsüpurtem account nung indang-indanga subsidy agütsütsü atema iba scheme ya 2013 küm tenzüka liasü.

Iba draft Bill ya nüburttem anemba bill ka lir, ta shia Mamata Banerjee-i Ato kilonser dang, "Iba bill tanaben

benoker ta osang angazüka ni aoksar. Atangji tangbo nüburttem anemba ozüng kar inoksema lir," ta metetdaksü.

Trinamool Congress tongti, Mamata-isa, "Power sector ya kanga tongtibang sector ka lir, anungji telok kati dang tashi mamshisüla, talisa 'electricity' ya state tem den jelia lemsateper inyaksüsa Concurrent List nung lir," ta metetdaksü.

"State Electricity Regulatory Commission teinyaksü shilem aser State Distribution Companies teinyaksü shilem na meyoktepba ya yimtenren tsütsü nungi state tentettem aser domestic industries samatsütsü nükjidong nung inyakba ama reprangteter," ta lai ashi.

### Wara mapang India nunger crore 80-i angati ration nguogo: PM Modi

**Bhopal, August 07 (Agencies):** Tang coronavirus wara mapang nung India nunger crore 80-i angati ration nguogo, ta Honibarnü Ato kilonser, Narendra Modi-i metetdaksü.

Madhya Pradesh nung Pradhan Mantri Garib Kalyan Anna Yojana ajanga tajangzük angurtem den video conferencing ajanga jembiba mapang Modi-i, wara mapang rations angurtem rongnung Madhya Pradesh nungia nisung crore 5 densema lir, ta metetdaksü.

Tesüiba küm 100 tsüngda meimchirtemi lendong

tamajungtiba ajurubaji coronavirus wara ya lir, ta shia Modi-i, iba wara prokba nokdangtsü atema nüburttemi maneni mask agitsüla, teka sanitize asütsüla aser tangar anasa maotsüla, ta metetdaksü.

"Coronavirus ajanga timtem balala anema raratsü asoshi India-i sensakertem tongtibangba kümdaktsü. Mezüng anogo nungi tenzüka sensakertem chiyungtsü aser mapa atema onoki bilemja Pradhan Mantri Garib Kalyan Anna Yojana mesüra Pradhan Mantri Rozgar Yojana ajanga onoki sensakertem yari," ta paisa metetdaksü.

### India nung anonisung 38,628 dak Covid putet aser 617 asü

**New Delhi, August 07 (Agencies):** India nung anonisung 38,628 dak coronavirus putet aser iba tashidak agi shiranger 617 süogo, ta Honibarnep Union health ministry-i metetdaksü.

Tang tashi nung India nung nisung ajak senteper 3,18,95,385 dak coronavirus putetogo aser iba tashidak agi shiranger 4,27,371 süogo.

Tang linük nung anogo shia coronavirus positive putetba shilem 2.21 lir aser tang iba tashidak agi teshirangdakpur 4,12,153 lir.

Tesüiba ghonda 24 tsüngda

coronavirus agi shiranger 40,017 anepogo aser tang tashi nung iba tashidak agi shiranger ajak senteper 3,10,55,861 anepogo.

India nung tang tashi nung coronavirus vaccine dose crore 50 dak tema agütsüogo.

Tang tashi nung linük nung coronavirus agi shiranger 4,27,371 süogo aser nisung timba asüba state tem rongnung Maharashtra (1,33,717), Karnataka (36,741), Tamil Nadu (34,260), Delhi (25,065), Uttar Pradesh (22,771), West Bengal (18,202) aser Kerala (17,515) state tem lir.



Mumbai, August 07, 2021: Honibarnü door to door vaccination drive kübok Ghansoli yim dak medical nisung kati tambur ka nem vaccine tutsüba noksa nung angur. Iba program ya Navi Mumbai Municipal Corporation-i ayongzüka liasü.

### Northeast Delhi nung ki ka chirep

**New Delhi, August 07 (Agencies):** Honibar nung northeast Delhi kübok Nand Nagri area nung anaben tashi amentepa asüba ki ka chirepba lendong nung nisung asem yirua hospital nung yaridar, ta police-i metetdaksü.

Fire department ketdangsertemi ashiba agi, Honibar nung 1:30 ako meta Nand Nagri kiyong nung aliba auto market ka nung ki ka chirepba lendong osang metetdaksüba sülen fire department gari trok iba tesem jagi yok.

Ki chirepba jagi tsünglanglen aliba dokantem anebanga liasü. Anasa alirtemi nisung ka kümzük aser Delhi Fire Services ketdangsertemia nisung ka kümzük, ta DFS

Director Atul Garg-i ashi. Delhi Chief Minister Arvind Kejriwal-i twitter ajanga, "Ki chirepba osang angashia jashir. Kümzükba maparen inyaksü atema akokba tashi yaridar. District administration ajanga ni iba tensa mita atadar," ta metetdaksü.

Police-i ashiba agi, ki kiburji Dhani Ram lir, aser par kibong-a iba kidangji telidak liasü.

Iba lendong nung yirur ki kibur, Dhani Ram, pa kinungtsü Anaro Devi aser Raj Kumar nung yirua GTB hospital-i anir oa yaridar.

Nisung kabo ki chirepba jana jagi anebanga alitsüa akok, ta bilema kümzükba maparen maneni inyakdar, ta police ketdangser kati metetdaksü.



August 07, 2021 nü BJP lenir aser Karnataka Minister, Shankar Patil Munenkoppa lokti senden ka nung adentsü atema Hubballi-i arudang party pusemertemi pa agizükba noksa nung angur.

### North Korea tzümetzung nungi nisung meyrejang aika aninogo



Aug. 5, 2021 nü South Hamgyong province nung ki tzü agi metsünga aliba noksa nung angur.

**Seoul, Luroi/August 7 (Agencies):** North Korea nung tzünglu kanga sashia aruba ajanga tzümetzung aruba sülen ki meyrejang ka dak tema raksaogo aser nisung 5,000 shi aninogo, ta linük public broadcaster-i sangdong ka ajanga metetdaksü. Tzümetsüng agi alua aika metsüngogo.

June ita North-i parnok chiyongtsü agi anünga sangdongba sülen tang iba osang sangdongogo aser iba ajanga aluyimba tsütsü timtem tulu adoker aliba linük atema tebilemtsü bendenlokogo.

United Nations Food and Agriculture Organization-i toba

ita, North Korea nung taküm chiyongtsü ton 860,000 shi agi anünger ta ashiba den linük nung timtem tulu ajangshitsü akok ta tekümdangtsü metetdaksüogo.

State meyong KCTV ajanga kilem tonga tzü agi metsünger aliba kitem sayuogo aser iba den apu raksar aliba sayuogo.

Ali ajunga metenjemer asünung tzünglu talila arura teraksatsüba tali akümtsü, ta Northern Meteorological Agency, deputy director Ri Yong Nam-i ashi.

"August 10 nü tashi anüdoklen tzüküm kübok tesem balala nung tzünglu kanga sashia arutsü imlar," ta Ri-i ashi. North

Korea lenir Kim Jong Un-i, alimar yimya agi teraksatsüba bener arutsüba jelia nokdangtsü atema sector aser unit ajak renema atatsüla, ta ashiba official Rodong Sinmun-i Honibarnü metetdaksü.

NK nung infrastructure tashi maitba ajanga timtem lendong tululu ajangshir aser arem moapu küma leprepba ajanga tzümetsüng tali arur.

Taoba küm yipru ishika aiba ajanga tzümetsüng adokdaksü aser iba ajanga ali aser ki aika raksatsüogo.

Kim-i June ita, yipru-i teraksatsüba bener arutsüba ajanga linük nung chiyongtsü agi anünga kümogo, ta ashi.

### Israel military-i Hamas amak

**Jerusalem, Luroi/August 7 (Agencies):** Israel nunger raradang amshiba tayimtsütemi Honibarnü anepdang Gaza Strip nung tesem ana makogo, ta Israeli military-i ashi. Israel nung mi adokdaksütsü atema Gaza nungi balloon tem yongba telangzüba agüja parnok iba jenjang agi.

Israel-i Balloon pezü yoka arem aser alu raksatsüba sülen Israeli military-i, Hamas military compound ka aser rocket yokba tesem ka amak. Ajisüaka Israel aser Gaza naprongla nung nisung asüba osangbo kecha mali.

Israel nung media sangdong balala ajanga ashiba agi, balloon amshia mi senoktsüba ya Hokolbarnü Gaza Strip anasa ataloka liasü.

Israel aser Hamas na tsüngda anogo 11 raraba sülen tang iba lendong atalokogo. 2007 küm hamas puri Gaza

atsünga sülen tang agi Israel den pezübenbuba raraogo.

Rara tembangba sülen Hamas puri yimsü asüba tesemtem nem tenokdangba agütsür aliba agintsü atema Israel-i jenjang shidak magiba ajanga parnok tezü atanger aser tang balloon amshiba ya parnok nongshitsü atema lir. Israel Ato Kilonser tasenba Naftali Bennet-i, balloon yokba ya rocket den medemdanga jembiogo.

Israel aser Egypt nati Gaza nem tenokdangba agütsür lir, kong Israel-i tzüküm aser airspace ajak amokbanga lir aser iba tesem nung nisung aser osettsüt senzusenpong aser belenshipera ajak azüoka lir. Israel-i, Hamas pur hadir bener aruba nokdangtsü atema tenokdangba agütsütsü nüngdaka lir, ta ashi ajisüaka critics temi tenokdangba agütsür aliba ya temerenshi ka lir.



Lebanon nungi rocket khaloktsüba sülen Israel nunger sepaitemi Lebanon den arrtsü nungi artillery khaloktsüba noksa nung angur. Hezbollah telungpurtemi Israel dak rocket khaloktsüba nangzükogo aser ashiba agi, Israel-i Lebanon anüolentip nung tesem kar amakba atema telangzüba agütsüba ka liasü.

### Pakistan nung Hindu nunger Temple ka amakba atema nisung 50 apu

**Islamabad, Luroi/August 7 (Agencies):** Pakistan kübok jila tila ka nung Hindu nunger indang temple ka amakba atema police temi Honibarnü temulung melemer rongnung tongtiba densema nisung 50 dak tema puogo aser nisung 150 dak tema aitsür lir.

Linük Supreme Court-i Hokolbarnü, iba lendong menokdangtetba atema ketdangsurtem aitsüba sülen aibelena alirtem aputsü tetuyuba agütsü aser ashiba agi, iba ajanga bendanger matsüngdang linük tenüng menükogo.

Rahimyar Khan district kübok Bhong tesem nung nisung noklang aikati sung long bener temple amak aser ki tesem kar rongtoktsüba den tekülemdak süngyanglu yua

aliba dena raksatsü. Local seminary ka nung natzü naloktsüba atema arishi küm ti tain Hindu nunger tebur chanu ka court-i chiokba atema parnoki iba jenjang agi.

"Bhong temple amakba ken o nung onoki tang tashi nung temulung melemer nisung 50 dak tema puogo," ta District Police Officer (DPO) Asad Sarfraz-i osangbenertem dang ashi. Paisa, video footage asdangba sülen anogo ishika tsüngda ano nisung timba aputsü, ta ashi.

Terrorism aser Pakistan Penal Code kübok tanga section dak ajemdaker temple amak nung shilem agir nisung 150 dak tema anema ken o benokogo, ta pai ashi. "Onoki iba tatalokba nung densema alitsü ta

temulung melemer bilemertem ajak aputsü. Supreme court tetuyuba dak ajemdaker temple yanglushi tenzükogo," ta pai ashi.

Hokolbarnü Pakistan Chief Justice, Gulzar Ahmed-i temple raksatsüba ajanga linük nem maksü bener arutsüogo kechiyong police-i iba tatalokba ajem ajema repranga ata, ta ashi. Chief Justice-isa, arishi küm ti tain ka police-i apuba dak sendakba nung süngmangseta police temi tanur chanu ka tangatetba angatetsü makok asü, ta asüngdang. Pakistan parliament-i Hokolbarnü temple amakba aija bangzüng ka agizükogo. Ken o angdangtsü atema August 13 nü tashi atsülangtsüogo.

### U.S. Embassy-i lisopurtem dang Afghanistan toktsür aotsü tuyu

**Kabul, Luroi/August 7 (Agencies):** US-i Honibarnü lisopurtem dang Afghanistan toktsür aotsü metetdaksüogo. Afghanistan nung Taliban puri asendenshia tesem balala makyonga aoba mapang ka nung tang iba tetuyuba agütsüogo.

"US-i lisopurtem dang tayimtsü mashi ka nung tangsa tang Afghanistan toktsür aotsü atema mepshia metetdaksüogo. Security tensa aser staff tajemba akümba ajanga Afghanistan nung aliba US nung lisopurtem Kabul nung densema anepalutsü atema Embassy tashi meite kümogo," ta Kabul nung amenoker aliba US Embassy sangdong ka ajanga metetdaksü.

Hokolbarnü osangbenertem den sensaksemba mapang White House otongdar Jen Psaki-i, US-i ken o kanga junga asadangdar aser Afghanistan nung civilian tem tepsettsü akok ta shisabulua bilemer, ta ashi.

Alima kintemi military-i Afghanistan atsünga mesera

Taliban indang Islamic Emirate amenokshiba magizüktsü, ta US-i Hokolbarnü ashi. Kasa mapang nung UN ketdangsurtemi Afghanistan nung tensa kanga mejungi kümdar aser iba mepetmesü ya arrtsü adena aotsü, ta ashi.

"Azütokshi tali akümba aser Taliban puri civilian aika tepsetba ajanga taoba küm 20 tsüngda democracy aser rule of law tsütsü tejakleni oa aliba atsüngzüktsü," ta UN nung US Mission, Special Political Affairs Senior Advisor, Ambassador Jeffrey DeLaurentis-i ashi.

Paisa, military tashi ajanga Afghanistan ken o mebenettsü aser Afghan nungeri achayanga Afghan nunger lenisüba nung sensaksem ajanga dang teti asoshi yimjung bener arutetsü, ta ashi. DeLaurentis-isa, Afghan nungeri achayanga Afghan nunger lenisüba nung tetsettem densema inyakym ka benokra Washington-i pusemtsü ta ashi.



Hokolbar aonung Tokyo nung train ka nung nisung kati train nung senzür nisung 10 yirutsü. Pai police dang ashiba agi, tetsür kar kanga pelaa angu aser iba sülen pai parnok tepsetnua ait, ta ashiba Japanese media sangdong balala ajanga Honibarnü metetdaksü.

## Dimapur nung awareness sentong ka agiogo



**Dimapur, Luroi/August 7 (TYO):** Community Health Initiative aser Prodigals' Home, Dimapur den longjemer Dimapur District Administration aser District Level Centre for Women-Mahila Shakti Kendra, BBBP-i nutrition, hygiene practices aser mental well-being dak sendakba nung awareness sentong ka ayongzuka katsüogo. Iba sentong ya August 7 nü Aoyimkum Panchayat Hall, Dimapur nung agia liasü.

Sentong nung alakteta jaoker ama arua shilem agiba mapang EAC, Dimapur, Nukshimatong-i, nutrition, hygiene aser mental wellness koda tongtibang iba indang lemsatepba den WHO tangatetba lepshi; "Health ya tashidak maketba mesera tashi

ita aliba dang masü saka shitemang aser tekelok shisatsü ajak anema aliba jenjang ka lir," ta ashi.

Temang asoshi chiyongsü tapet achitsü aser physical exercise agitsü koda tongtibang iba indang lemsatepba EAC-i sentepa alirtem dang organic süngjanglijang aser anosotsü achitsü ayongzük, koba pai ashiba agi kima atsü nung mela mela dang tsünütetsü. Mapa tajung inyakba ajanga nisung ka pelaa toktsür ta shia Nukshimatong-i, kar dang temeim sayuba, kati ka ajungketba aser nungdaka aliba nisung ka yariba ajanga nisung ka jangrademdaksür aser iba ajanga tepela bener arutsür ta ashi. EAC-isa, iba amala sentong tajung ayongzükba atema sentong ayongertem

dang kanga pelaba lemsatepba den temsüa alirtem ajak nem Covid vaccine agütsüjemba atema Aoyimkum yimtsüing nem tenüngsang agütsü.

Maneni sentong nung Women Welfare Officer, DLCW-MSK, Lanusangla Jamir-i, nutrition onük nung jembi aser Director, Community Health Initiative-i menstruation hygiene practices indang jembi. Kasa mapang nung Prodigals' Home nungi Sungkum Aier-i, Mental Health Community Awareness indang jembi.

Iba sentong ya Tiajungla lenisüba nung agi aser lokti pelaa agizükba o aser tepela anküp o, District Coordinator DLCW-MSK, Dhonthaidi Langthasa aser Ajungla nati jembi liasü.

## Tuensang District Planning and Development Board senden amen



**Tuensang DC aser vice chairman DPDB, Kumar Ramnikant-i DPDB senden nung jembiba noksa nung angur.**

**Tuensang, Luroi/August 07, 2021 (TYO):** Honibarnü, DC Conference Hall nung Tuensang District Planning and Development Board (DPDB) senden ayonga agiogo. Iba senden nung, DC aser vice chairman DPDB Tuensang, Kumar Ramnikant menden liasü, ta sangdong ka ajanga metetdaksü.

Aruya Independence Day benjungmung dak sendakba nung mapalem balala atema telok olemtepogo. Tuensang nungi Noksen tesem tashi NST bus service tenzüksü asoshi onük benoka jembitep aser taruba DPDB senden nung iba maparen atema inyakyimtem agütsütsü asoshi tim department dang metetdaksüogo.

Associate Director ECS, Chongshen-i, COVID-19 vaccination drive indang mezüing shilem achayanga agiba osang metetdaksü aser iba mapatong nung shilem agia nungita yariba atema pai district

indang HODs ajak dang pelaba metetdaksü. Chongshen-i district nung 2buba aser 3buba vaccination drive indang anogo/ mapang telok dang metetdakja liasü.

Tanabuba vaccination drive ya August 22 nungi August 29, 2021 aser tasembuba vaccination drive September 19 nungi September 26, 2021 tashi agitsü ta pai metetdaksü; aser drive shilem anaprongla vaccine ajema agütsüba yimtsüingtem nung rangloker achayangtsü sentong lir, ta Chongshen-i shisem.

Home Department ajanga teyuba ama, iba senden nung 75buba India Independence benjungmung atema Tuensang District nung maparen kar inyaksü asoshi telok bangjemtepogo.

August 09, 2021 nü NYKS ajanga National Flag Rally ayongzüktsü aser tower clock merükettetsü. Kasa anogo GM DIC ajanga Rural Technology

nung tesayuba agütsütsü.

August 10, 2021 nü, class 1 nungi class 7 nung azünger kaketshirtem atema DEO-i otsüno tetoktepba ayongzüktsü. August 11, 2021 nü, DLCW-MSK ajanga baking class achayangtsü aser August 12 nü Shamator nung NYKS ajanga national flag rally agitsü aser ADC office merüktsü.

Maneni, DYRO DSO ajanga August 13, 2021 nü bike rally aser basketball exhibition match ayongzüktsü. August 14 nü DEF ajanga Tuensang Town nung Mini marathon ka ayongzüktsü aser tanur temeden (Child Rights) nung tekümdangtsü osang sangoktsütsü atema SAKHI-One Stop Centre-i Bethel Children Home semdangtsü.

August 9 nungi August 14, 2021 tashi RD Block balala nung Plantation Drive aser Cleanliness Drive ayonga agitsü, ta sangdong nung shia lir

## MULUNEN O

"TAKÜM YIPRU AJANGA KEN TENA ANISÜNGZÜK ANGU, YISU TEKA NUNG"



30/5/1930 – 1/8/2021

Onoki kanga ameima aliba asür T. LANUTOSHI JAMIR (Longjemdang Village) asüba anogo 1st Aug. 2021 nü nungi ABAM-i anir arogotem, Music society, ken tenertem, yimertem, kiyongertem, adianutem shirnokisa nübu rongsen, sarasadem, shisatsü agi ozü kinungertem den yaritepogo, nenok taküm aser mapa tajung Teyanglur Tsüngremi teti moajangma.

-Temeim kinungtsü aser kinungertem

## DRIVER KA BUSHIR

Kohima nung Gari anishitsü atema AG, Chanmari, Lerie aser PWD colony, Kohima nung alir nübu ka bushir.

Itasen - 8,500/-

Tejangrartemi iba number ajanga tongtepratepang: 7005083159



OFFICE OF THE  
**JANGPETKONG STUDENTS' CONFERENCE**

H.Q : Alongkima, Dist:- Mokokchung : Nagaland.

Motto :- "Advancement in Unity"

## TENÜNGSANG AGÜTSÜR

CBSE ajanga 2021 küm agiba AISSCE tatidang nung **Sb.Yimjungjungshi Sanglir** S/o I. Anungba Sanglir (Molungyimsen), ajang Delhi Puplic School Dimapur nungi Arts Stream nung marks 94.4% nguteta takok tajung ajangtetba asoshi pelaba den Tsüngrem tenüng asanger .

Maneni nü taküm kaket shisatsü bushiba nung Tsüngrem-i len aniang ta sarasademtsür.

Sd/-  
**IMLIAKUM**  
EDUCATION SECRETARY, JKTM.

## CVC-i nüburtem dang aremzüka atatsü mepeshi

**Dimapur, Luroi/August 7 (TYO):** Chümoukedima (2nd Gate nungi NIT, Nagaland & 1st gate/RP Gate nungi NIT) nung tang lenmang yanglua aliba dak sendakba nung Chümoukedima Village Council (CVC)-i kiyong balala aser nüburtem dang lenmang yangluba ajanga tetsükdaksü adokdaksüba aremzüka atatsü aser iba mapa nongita yaritsü mepeshia metetdaksüogo.

CVC-isa, iba lenmang dak metaloker aliba nüburtem dang mepaitoktetba maparen kar mesera iba lenmang mamshitsü mepeshia metetdaksüogo, kechiyong iba ajanga minprong kecha makai lenmang takaratiba nung yanglua otetsü.

Kasa mapang nung lenmang nung gari lendung balala nungi jenbotsü aser nüburtem aser mapa inyakerem kümzüka toktsütsü asoshi iba lenmang nung senzürtem dang mapang ajak nung speed limit 20km/hr nung senzütsü CVC-isa mepeshia metetdaksüogo. Iba

speed limit kübok senzüba ajanga awi agi mopung menentsüba tajemba kümdaksütsü, kechiyong lenmang tezülen alirtem awi ajanga kanga timtemtepdar, ta CVC-i ashi.

Maneni CVC-i, tang yanglua aliba lenmang nung raksarakbong balala nungi jenboa alitsü atema kiyong ajak dang takok tashi teyari agütsütsü mepeshia metetdaksüogo. Lokti ajangzüktsü atema inyaka aliba maparen kecha tetsükdaksü makai inyakyonga aotsü atema jenjang tapet agitsüji lisopur ajak mapa lir.

Lenmang yanglua aliba company temi atakzükja aliba mapang shidak nung lenmang tajungtiba yanglutsütsü imlaa ataba CVC-i lemsatepogo. CVC-isa, Chief minister Neiphu Rio lenisüba nung sorkari chümoukedima nung aliba nüburtem temtem tekangshia angateta lenmang koba küm 20 dak tema meyanglushi liasü, iba lenmang yanglushitsüba atema kanga pelaba lemsatepogo.

## Pungro nung legal awareness sentong agi

**Pungro, Luroi/August 07, 2021 (TYO):** Honibarnü, Pungro Town kübok Cultural Hall nung, Kiphire District Legal Services Authority-i legal awareness sentong agiogo, ta sangdong ajanga metetdaksü.

Iba sentong nung Nagaland State Legal Service Authority, Member Secretary, Longshithung Ezung, NJS-i okila jembi. Michael Aye, APP, Kiphire-i 'Right of Arrested Person' onük nung ajemdaker jembi. Kasa mapang, R/Lawyer DLSA Kiphire,

Bendangwati Sangtam-i Nagaland Village and Tribal Council Act indang nung jembi liasü.

Iba sentong nung DPA, DLSA, Kiphire, Rebica T Sangtam menden liasü aser CJM-cum-secy, Phuleto Yeptho, NJS-i telok pela agizük.

Kasa anogo, ADC office compound, Pungro nung, ADC Pungro, Abhinav Shivam, IAS matsündang Longshithung Ezung, NJS-i Legal Aid Clinic Office semzükja liasü, ta sangdong nung shia lir.

## Tokyo Olympics: Neeraj Chopra-i gold medal angu



Neeraj Chopra

**Tokyo, Luroi/August 07, 2021 (Agencies):** Honibarnü, Tokyo Olympics nung otsüsüsüsa Neeraj Chopra-i gold medal angu. Shooter Abhinav Bindra sülen, Olympics nung kijai gold medal takok angur India nung athlete rongnung Neeraj tanabuba kümogo.

Tebur javelin throw asayamung nung, Neeraj-i metre 87.58 shi yokteta gold medal ajangzüktet. Neeraj-i gold medal anguba densema

Tokyo Olympics nung India contingent-i medal 7 tashi takok nguogo, koba 2012 London Olympics nung India team-i medal anguba dang nungi timba asütsü. London Olympics nung India-i medal trok angu.

Tokyo 2020 nung, India contingent nung kijai medal takok angur athlete rongnung Chopra trokbuba kümogo. Kasa asayamung nung weightlifter Mirabai Chanu, badminton asayar PV Sindhu, boxer Lovlina Borgohain, wrestler ana

Ravi Kumar Dahiya aser Bajrang Punia nungeri medal kokogo.

Iba asaya (men's javelin) mezüing round nung Neeraj-i metre 87.03 shi yok aser tetokteper ajak rongnung pai mezüingbuba jenjang ajangzükteta liasü. Tanabuba round nung, Neeraj-isa metre 87.58 tongtet aser tanüingba asayartemi pa memenep. Ajisüaka, tasembenbuba merandangba mapang Neeraj-i metre 76.79 dang yoktetta liasü.

Arishi küm 23 tain Neeraj-i Czech Republic nung Jakub Vadlejch aser Vitezslav Vesely madak takok angu. Vadlejch-i silver medal (metre 86.67) aser külem asayar Vesely-i bronze medal (metre 85.44) takok angu.

2008 Beijing Olympics nung Abhinav Bindra-i gold medal takok anguba sülen Neeraj-i India atema tanabuba (individual medal) gold medal angur asütsü.

## Tokyo Olympics: Bajrang-i bronze medal angu



Bajrang Punia

**Tokyo, Luroi/August 07, 2021 (Agencies):** Honibarnü, tebur freestyle 65kg category nung, Bajrang Punia-i Kazakhstan nung Daulet Niyazbekov tsükdaktsüba sülen, pai bronze medal angu.

Semifinal nung Bajrang-i 5-12 agi Azerbaijan nung Haji Aliyev makokba sülen, bronze medal bout nung pai 8-0 agi Daulet koka India atema medal trokbuba bendenlokja liasü.

Olympic asayamung nung, medal takok angur India nung wrestler rongnung Punia trokbuba kümogo. KD Jadhav, Sushil Kumar, Yogeshwar Dutt, Sakshi Malik aser Ravi Kumar Dahiya nungeri Olympic medal takok ngua lir. Tokyo Olympics nung, külem India nung Ravi

Dahiya-i men's 57 kg category nung silver medal kokogo.

World championship asayamung balala nung Bajrang-i asemben tashi medal koka lir. 2018 aser 2019 World Championship 65kg category nung Bajrang-i silver aser bronze medal nguogo. 2013 küm world championships - 60 kg category tetoktepa nunga pai bronze medal takok angu.

Ano, 2018 küm Commonwealth aser Asian Games asayamung nunga tebur 65kg category nung pai takok bena lir. Iba asayamung anaprongla nung pai gold medal takok angu. 2014 küm CWG aser Asiad asayamung 61kg category nung pai silver medal kokogo.

## Tokyo 2020: Yafai-i gold medal angu

**Tokyo, Luroi/August 07, 2021 (Agencies):** Honibarnü, Tokyo Olympics nung 'men's flyweight final' asayazüker sülen, Galal Yafai-i Britain atema mezüing boxing gold medal angu. Kokugikan Arena kübok ayongba Tebur flyweight final nung, Yafai-i Filipino nung Carlo Paalam tsükdakja gold medal koka liasü.

Arishi küm 28 tain aser Commonwealth champion Yafai-i 'split decision' ajanga takok angu, saka iba bout'tenzüker nungi tatem tashi pai Paalam amokbanger asaya.

Galal Yafai-i car factory ka nung mapa inyakdangogo aser pa den adianu (brother) ana lir. Galal adianu anaprongla boxer takoktet lir.

Iba bout temer sülen, Paalam-i silver medal takok angu aser Philippines atema küm 57 nung Olympic boxing asayamung nung Paalam-i medal pezübuba takok angur asütsü.

Tang, Tokyo Olympics nung, Yafai-i gold medal anguba den Britain team-i boxing asayamung nung silver medal ana aser bronze medal ana koka lir.



Galal Yafai

Kasa asayamung, tebur middleweight final tetoktepa nung, Ukraine top seed Oleksandr Khyzhniak aser Brazil' nung Hebert Sousa na asaya liasü. Iba bout tasembuba round nung Sousa-i Khyzhniak dak tsüingokja laodaktsü (knocked out).

Tebur middleweight final asaya tenzüker sülen, tetendanger indang scorecard nung Khyzhniak point timba agi Sousa tejakdang ser asaya aser pai gold medal takok angutsü teimla liasü. Ajisüaka, round tasembuba nung, aoksdang asaya melenshiadok, kong Sousa-i pa teka abilen agi Khyzhniak tejak nung tsüingokja pa laodaktsü. Idangjisa, referee-i iba asaya anendakja liasü.

Iba bout indang mezüing

round anaprongla nung Sousa kanga mejungi tamakok angu. Ajisüaka, 'knockout' ajanga Sousa indang bout jenjang melenshiadok.

"Knockout ajanga bout aikabo kokdanga mali, saka sparring session' tem nung iba tasa amshitsü asoshi ni tali temulung agüja training agir. Sparring session nung inyakbatem yimdangi arur aser iba bout nung tasa amshitsü merandang. Tiaka bilemba ama jangratema asayaogo," ta Sousa-i ashi.

Tokyo Games, Boxing tetoktepa tanga category nung, Nesthy Petecio-i tetsür featherweight silver medal aser Eumir Marcial-i tebur middleweight bronze medal kokogo.

Kokugikan Arena kübok, tetsür flyweight telemsa nung, Stoyka Krasteva-i gold medal kokogo. Iba bout tetoktepa nung, arishi küm 36 tain Bulgaria tsür Krasteva-i Turkey tsür Buse Naz Cakiroglu madak takok angu. 1996 Olympics sülen, Tokyo Games nung Bulgaria atema boxing nung Krasteva-i mezüing gold medal takok angur asütsü.

## Uttarakhand sorkari Vandana nem senpet agütsütsü

**Dehradun, Luroi/August 07, 2021 (Agencies):** Tokyo Olympics nung India tetsür hockey team nungi shilem agiba atema, Hokolbarnü, Uttarakhand Chief Minister, Pushkar Singh Dhama-i Vandana Katariya nem senpet lakh 25 agütsütsü sangdongogo.

"Tokyo Olympics nung kodanga mamatetsüsa India tetsür hockey team-i junga

shilem agiogo aser Uttarakhand nungi Vandana Katariya-i külem team pur den junga shilem agiba atema nümatanga bilemer. Vandana dang pelaba sayua la nem senpet lakh 25 agütsütsü," ta Dhama-i ashi.

Asaya balala nung sempet tajung alir saisapongertem tesayuba agüja anitetsü asoshi, State nung saispong tsütsü mapatong tasen ka

tenzüksütsü, ta Dhama-i shisem.

Tokyo Summer Olympics 2020 nung, India tetsür hockey team-i mezüing Olympic medal ka angutsü asoshi teimla yur shilem agia liasü. Ajisüaka, Hokolbarnü bronze play-off match nung parnoki goal 3-4 agi Great Britain makokba ajanga medal angutsü mangdang matalokteti tembang.

## CM Manohar dang pelar: Ravi Dahiya

**Tokyo, Luroi/August 07, 2021 (Agencies):** Tokyo Olympic asayamung nung silver medal takok angusang wrestler, Ravi Dahiya-i Haryana Chief Minister Manohar Lal Khattar dang pelaba lemsatep. Ravi ya Sonepat kübok Nahri yimtsüing nungi lir aser CM Manohar-i iba yimtsüing nung Indoor Wrestling Stadium ka yanglutsütsü sangdongba atema Ravi Dahiya-i pelaba lemsatepa liasü.

"Nahri yimtsüing nung Wrestling Indoor Stadium ka yanglutsütsü sangdongba atema Chief Minister dang kanga pelar," ta Twitter sabang nung video ka ajanga Ravi-i lemsatep.

Mapa den külemi senpet agütsütsü nangzüka asayartem ajungmesoba atema, Ravi-isa Chief Minister Manohar dang pelaba shisem.

"Tokyo Olympics nung shilem tajung agia takok anguba den Haryana aser linük nem naroküm bener arutsüba atema Ravi Dahiya nem tenüingsang agütsür," ta Twitter ajanga Manohar-i lemsatep.

"Na ama sempet tajung alir asayartem ajungmesotsü tebilemba nung, onoki mapatong



Ravi Dahiya

balala sangdongogo. Onoki Haryana ya saispong tesem tulutiba ka kümdaktsüner," ta Manohar-i ashi.

Tesüiba anogo ishika tejakdang, Olympics asayamung nung wrestler Ravi-i silver medal koka India nung wrestler rongnung medal takok angur tanabuba akümba atema Manohar-i Ravi nem tenüingsang agütsüogo. Tokyo Games - men's freestyle 57kg final nung Ravi Dahiya-i 4-7 agi world champion Zavur Uguev makok.

Ravi-i Olympic nung medal takok anguba atema, Haryana State Sorkari renemba ama pa nem senpet cr. 4 den Class-I job' aser ali ka agütsütsü.

## BILEMDANGANG

"Tebang o dang nungibo yimya tajungi mapa tuluba inyaker."